

四庫全書薈要

• 乾隆御覽本

集部

欽定四庫全書薈要

集部

文憲集卷十六




文憲集卷十六

明 宋濂 撰

碑凡二十三章

金谿孔子廟學碑

金谿縣令李子敬脩建孔子廟學成廟之殿及戟門皆仍其舊罅漏者補葺之黝昧者丹堊之學之論堂廟之西東廡與夫肄業之舍皆新作之論堂為間者三崇二十又二尺縱視崇而弱其二尺橫視縱而強其十尺肆

業之舍為間者左右各三兩廡視舍其數各再倍之經  
始於洪武七年八月至十月訖功嗚呼元季兵亂邑廬  
盡毀而廟學歸然獨存是固有相之道而賢大夫復能  
汲汲為此可謂知化原者矣助其成者縣丞楊乾主簿  
劉祺典史喬思道子敬既相率釋奠已使教諭曾易徵  
文於濂濂序其故而系之以詩廟學緣起及三遷之詳  
則舊記存焉詩曰

金溪之山翔躍猶龍下有學宮靈氣所宗篤生大賢惟



我陸子究明本心遠探聖髓其道朗融白日青天纖塵  
不驚萬象著懸矧茲鄉學可不亟圖孰其興之實邑大  
夫機動籟鳴泉赴川增其從之者緝緝繩繩三月之間  
用幣告成龍礎鳳甍文枕丹楹氣象改觀煥乎聲明人  
亦有言有詩有書有齋有廬式寧其軀匪居之為娛前  
軌是趨念此小邦文物則衍其氣夜發電流虹轉學子  
翩翩期文之頌匪文之為勸惟形是踐我作我詩為勸  
甚力聖謨孔彰萬古一日有赫其臨敬之無數

蘇州重修孔子廟學之碑

蒲圻魏公守姑蘇之明年鋤暴樹良無令弗肅上下洽  
和百廢具興惟孔子廟學弗治棟楹傾欹丹堊黝昧若  
不能支旦暮者公顧瞻良久愀然弗寧乃登僚案縣令  
丞暨尚義之士咸集於庭喟然嘆曰皇帝以神武定四  
海即大興文治詔以明經六藝之科頒示郡邑使選第  
子負肄講明體適用之學將以人文化成天下今敝陋  
至是非所以靈承帝意予先捐俸為倡爾二三君子幸

相與圖之穹殿邃廊虔奉明禋櫺星之門神道所繇其  
後為寢吳江葛德潤爾其葺之論堂有嚴兩廡相嚮挾  
以六齋以通於前門吳江甯璇汝其修之亭號采芹  
下臨康衢來游來歌多士攸宜崑山張庸爾其整之公  
言未已吳江令許茂進曰邑有八士曰李庚等頗有意  
乎書詩尊經之閣先賢諸祠游息三亭以至庖湍橋梁  
之屬茂率其承之長洲丞丁師尹復進曰許令然矣師  
尹獨不可為乎若止善堂及中廊達于閣者當諭羣儒

使賦金俾里耆唐晟視其役焉公大悅唯周垣四千八百尺未有所屬僚若佐遂以罰布飲助而吳縣令曾輔驩然趨功役邑夫畚粘土繩繩而來事因大集始事於洪武六年二月戊辰而訖功於十二月某甲子如輦斯飛如雲斯凝如濤斯湧深沉而潔清宏麗而靜密一還承平舊觀公帥其屬執豆籩具脯醢以成功告觀者如堵牆莫不嗟嘆自兵興以來學宮所在蹂踐為墟而姑蘇幸僅存非公之至幾何不與之俱廢乎教授貢頴之

既宣力於始終復使訓導張田請記其事以垂不朽惟  
蘇之有學實始於范文正公蓋公景祐初出守鄉郡擇  
南園之地奏請於朝而建是學為其師者則安定胡文  
昭公也計當時人物固嘗盛矣數百載之下仰其聲光  
慕其風烈每使人發不可企及之嘆自時厥後雖有賢  
愚而學之興廢靡常而二公過化之地流風遺俗終未  
泯也況今遭逢有道之朝而得良二千石為之師帥豈  
徒然哉然公興學之志不下於范公者也則夫坐臯比

而談經藝者其必將取法於文昭乎明體適用之學吾  
知駸駸然向盛矣苟不務出此而摘英擷華為譁世取  
寵之具非區區所敢聞請以是刻諸麗牲之碑庶幾蘇  
之人士知所自勗哉公名觀字杞山通周易為人疏達  
無滯滯如八牕玲瓏見義勇為雖千萬人不可遏所至  
輒烈烈有聲同知府事李權通判徐弼推官趙霖皆號  
一時之選與公道合故成事無難者碑為脩學作前代  
興造各自有記皆不書惟當書者不敢拘於文體而不

致其詳焉系之以詩曰

姑胥之墟有川澍澍折趨南園匯而東流靈氣中啟渙  
爛弗收自非聖師疇協其休昔有哲人出綰郡章乃尊  
學宮乃建廟堂廟堂章章學宮將將衿佩洋洋來朝來  
翔盛衰相因揆理則然風摧雨蝕上漏旁穿矧丁艱虞  
烽火相連誰舉一臂持危扶顛大明當天九服攸同叶  
攬搶斂翳奎壁吐芒睽我魏公來蒞大邦屢形於言我  
敢怠遑既率部封復登府僚分勞授事具乃教條曾不

一暮厥功孔昭化此朽腐鬱為峒堯孰敦化原孰築教  
基孰牖民彝匪學曷為我語蘇人公豈爾私耳目苟具  
必致其思思之如何法孝與忠二者無媿行將天通震  
澤有石其堅比銅史官勒辭用昭無終

胡越公新廟碑

丈夫之遇於時也生使人懷之歿使人思之且建廟食  
於其土必其德澤入人之深堅如金石而弗渝信如四  
時而弗爽照如日星而不忒然後足以厭乎人心而合



乎輿論也嗚呼豈易致哉若今之胡越公者其庶幾無愧於此乎自辛卯兵興天下大亂民遭溺焚倭倭無所棲止皇帝手秉黃鉞起而救之屯兵滁陽公杖策謁轅門一見語合遂居前鋒以佐揚天威乙未春二月王師取和州夏六月下太平丙申春三月平金陵攻京口丁酉春三月又拔毗陵公皆列戎行或擐旗斬將或操螭弧以先登前後屢建奇功乃授右翼統軍元帥使宿衛帳下夏四月又從破宣城上命行樞密院判官鄧愈成

宣公副之秋七月遂同諸將攻徽州拔之元將楊完者

聚兵十萬欲復其城公自婺源兼程以進橫槊而前大

呼殺入衆皆披靡而遁戊戌春三月諸將克嚴州公又

偕往降溪洞兵二萬以功遷行樞密院判官公謂蘭溪

去嚴為甚通蘭溪下則斷婺之右臂矣冬十月乃下蘭

溪十有二月王師取婺州陞公僉書行樞密院事公益

思有以自效己亥春正月攻陷諸暨州十有一月又平

處州庚子夏五月又拔信州信方絕糧人皆勸公還師

公曰此閩楚喉衿地也可棄之乎乃築城浚隍為堅守  
計辛丑夏五月上憫公之勞且以婺為海右大藩通甌  
引越非宿將重臣有以控制之不可乃授公江南等處  
行中書省參知政事屯戍於婺壬寅春二月溪洞兵叛  
而西歸公遂遇害知公之死者莫不哀慟流涕如喪厥  
父母上聞之亦震悼弗置親御翰墨作文以祭且命有司  
塋公像配享卞忠貞公廟庭甲辰冬復降旨贈光祿大  
夫浙東等處行中書省平章政事柱國追封越國公先

是公歿之明年公之部曲與境內之民悵然遐思若不  
能勝其情乃相率即城中作新廟一區十閱月而廟成  
堂門庭廡咸具及是寵褒之命下復羣謁於金華宋濂  
部曲進曰公之號令素嚴人無違禁賞非無功罰非無  
罪使我等攻必克戰必勝而不冒於寵靈之內者公之  
賜歟我之病也孰知而起之我之凍且餒也孰察而周  
之其能親自裹創注藥及安於食且衣者非公之賜歟  
公之德我何以將之境內之民又進曰吾婆之民凋瘵

殊甚公專心撫摩之昔也奔走西東歲無寧居今也長  
幼一堂愉愉雍雍非公之賜歟昔也商賈不通布穀不  
登今也市區充溢百貨具集非公之賜歟昔也厄於暴  
強莫敢何問今也攘一莖茅公亦使償之如承平時非  
公之賜歟公之德我亦何以將之茲者龍光下被爵登  
上公人神洽熙雲日潤明乔木動搖如有喜色適新廟  
告成願為我詳紀公之功德以垂示於無窮是用合辭  
以請濂竊觀古之名將出成邊域者矣苟得甲士之驩

心則耕田鑿井之氓必至於弗寧使斯民稍得以遂其生則持戟荷戈者必不免於愁歎孰有能兩全者哉若公者可謂尤賢乎已公嘗自誦曰我不知書然吾行軍惟有三事而已不殺人不虜人女婦不焚人廬舍故其軍一出遠近之人皆爭趨附之蓋公處心以仁蒞事以威惟其仁也故不言而民化惟其威也故不待戒而兵自不敢犯昔者祭征虜制御士心不越法度所在吏民不知有軍及其死也人為立祠享之較之於公其事固

無大相遠也廟而祠之其誰曰不宜初公之未薨嘗夜  
出人見其兩目煜煜有光若燈及其既薨敵人數擾我  
邊陲公降祥異或見夢於人或覩靈火滿野洶洶聞人  
馬聲洎出師輒大捷似實有陰兵來助者是則公之英  
魂烈矣下上於星辰之間固未嘗亡也因併及之使知  
天之生公有非偶然者公姓胡氏諱大海字通甫泗之  
虹縣人詩曰

聖皇啓運四方攸同升龍在天颯狂雲從中有一人萬

夫之雄其人謂誰時維越公其凜凜越公勁氣橫驚手

荷鍬受其繁若略彼趨以馬我捷以步陷陣如飛逢者

必仆其天兵四出靡弗在行瞠目疾視前無堅城有聲

恍恍敵人震驚土疆既拓大勛以凝其皇帝曰都爾主

羽翼娶維雄藩爾鎮其域爾奉政府解爾宥密爾勞爾

徠以盡乃職其公既受命兮閭建牙威讐化孚莫敢或

譁汝顛汝掖汝疾汝摩化汝呻吟而為謳歌其視彼郊

原其耕釋釋視彼闐闐其通繹繹視彼室廬其居奭奭



何以致斯伊公之力

六其

我民無祿俾公棄捐精神上游

固合化權民之云思其何舍旃匪廟曷祀非祀曷虔

七其

乃簡覽材乃端術徑乃差穀辰視星之定林衡奔事班

僊稟令紮稅星錯素階玉瑩

八其

邃清有寢嚴衛有門旁

夾有廡四繚有垣肖像中居威神騰軒陰風肅如髣髴

若存

九其

維公顧綏時著靈響幽火東驚鏃騎西上赤幟

一揮無敵不殲孰不生畏孰不景仰

十其

生為名臣死為

明神策書所列指可縷陳矧公之英貫乎屈伸幽明有

殊神人則均

其一

公實惠我弗閒弗貳人之依公如旌

繫旒登我稼穡遏我妖沴歆我明祀欽於世世

其二

景祐廟碑

景祐廟者宋殿前司統制祖公廟也公諱域字真夫其  
先閩人後徙明奉化之松溪公有文武才建隆中以剛  
毅稱居鄉黨遇歲飢發私廩以賑餒夫所活以千計里  
有昏喪貧不能成禮出財帛周助之子弟不能學者為  
招師儒使就學焉邑人咸德之既歿皇祐二年遂作廟

於忠義鄉之福慶里有故必相率趨禱滅火愈疾屢著  
奇徵元祐中漁者鄧祺徐寶泛海值風舟起立者數四  
懼死呼神求救公忽見於室中應之俄而火光如斗墜  
檣下風頓息起視所在舟已至公廟下矣建炎四年高  
宗南奔御舟次崎頭金人將舟師追其後將及見赤旗  
數萬蔽海上金人沮懼而退是夕提領海舟張公裕夢  
神人虎韞魚服奏對上前自稱官位姓名公裕以聞高  
宗多公之績制封文惠侯賜廟額為景祐元大德十二

年大疫死者相枕民禱公公降於人指廟東井命民飲  
病者飲水立愈明年蝗發境上官督民捕蝗日以斗斛  
徵之民泣訴於公頃之蝗飛積廟前高數丈民取以輸  
遺蝗亦皆自投於海未不為災至正十一年海盜起將  
剽掠邑民會大風揚沙晝晦不可辨盜迷失道而退後  
盜復至鈔民財無所得怒欲火廬舍至廟若聞弦誦聲  
驚駭相顧卒不敢犯二十二年有巨蝶集里巷螫民膚  
即死民神事之迎置於廟公復降於廟巫手撲殺之者

耆卓在明汪敬行等列其事聞於朝二十六年加以昭  
烈之號皇上有天下以為凡神之封爵宜命於天非人  
所敢與洪武四年乃詔儀曹易公號為故義士祖公之  
神每歲季春縣令用剛鬣行祀事著為恒制敬行之弟  
敏學復謂公自宋初至於今四百年功烈及於民者甚  
久而未有文辭昭靈焯美垂之無極甚非事神之道乃  
遣從子正來請傳其事於碑夫公以一將之微其生也  
非有公侯之貴萬鍾之富而獨能惠其鄉既死數世復

能濟其君於艱難而保鄉邑之民於無窮非烈士夫能然哉是可歎也已其詩曰

斗牛之南大海堦羣山律萃植翠檀乾靈坤秀鬱不宣  
篤生祖公維俊賢虎眉虬髯高兩顴右握寶刀左屬韃  
指揮貅貅立殿前晚辭天子歸林泉傾萬金貲振顛連  
聞人急難刺在肩有弗能拯食不咽曰生施惠靡遑年  
死為明神叅化權鬱攸肆虐焚氓屋揮唾沃之不敢煽  
颶風掀浪欲拍天漁舟葉出立以旋火燄如日隨檣端

手提白骨出重淵鑾輿狩南濟大川追者十萬蟻慕羶  
身率以君將樓船赤幟塞島敵愕然璽書褒忠禮彌虔  
坐秉躬圭冠貂蟬厲鬼跳浪民告瘼以藥投井飲輒痊  
飛蝗被野禍夫田神氣一噓舞翩翩如蛾赴火積成山  
立使凶歲為有年海盜操矛口流涎揚沙撲面懾以還  
退奔相蹂行踰躑鉅蝶為妖大如鳶家趨巷祭陳豆籩  
以掌擊之民害蠲邑民戴公綏以安歲時扶携謁廟門  
清酤在觴几蒸豚鐘喧鼓考雜管絃公騎蒼麟手執鞭

龍旂獸盾衛者千來如旋風止如烟顧民欲去不忍言  
民拜願公毋我捐俾禾如茨黍蛇蟠疾害不作福祐縣  
公名不朽同坤乾

重建寶婺觀碑

婺之寶婺觀祠婺女星始作於唐武德四年初在郡城  
西北吳越有國時刺史錢儼徙於子城上西南陳宗淳  
熙十三年以知州事洪邁請賜今額元九十年毀於火  
者再皆官作之國朝洪武五年秋觀復災主觀道士楊



道可與其徒同志者德生德清謀謂祠星所以休民興  
後而出於官是厲民也厲民弗祥乃持厯走境內告於  
衆庶各出貨泉相厭事而屬劉仲謀等十餘人司出納  
之任伐木於大山長谷乘流而致於城下僦匠傭工甃  
城增址作正殿五楹間其南為重閣三間殿與閣之中  
構為飛亭亭之後先聯屋以合庭雷三門舊在閣南正  
直通塗今遷閣東三十步由門循廊西上抵玄武神祠  
又折而西始升於閣三門之右別庭玄壇廟餘若齋居

賓館之屬各以次就緒而星之像猶未具先是杭州衛都指揮使徐君司馬嘗出鎮於婺屢徼靈於星祠其在杭也夢有所見遣使者問所須以像闕告因命斷沉香為像名其閣曰靈華而奉像置其上道可復迎其教所嚴事者共祠焉工始於災之明年越六春秋至十二年冬始成蓋役夫糜錢以鉅萬計而有司不知州民懽忻趨謁以為有所憑依不可無以示來者於是道可持幣走告於濂曰婺以星名州星之澤州民者甚大宋宣和

三年方臘反睦將陷郡統領劉光世討之兵次蘭溪未  
敢進夢霞冠羽衣神趣之行且以病指告劉至盜黨就  
禽及謁星祠其像如夢中一指將墜開禧三年大水先  
期告守土吏為備民不漂溺景定四年武義山寇為亂  
來犯城屯於溪南遇媼驚散去元至元十三年郡既降復  
中人屢皆若是耳盜驚散去元至元十三年郡既降復  
守元將高興怒欲屠城夢神諭以勿殺明日以火矢射  
觀矢返隨軍中見巨人坐城上濯足城南水中大駭遂

下令風民降不敢戮一人至正十六年沿海翼兵自蘭  
溪夜叛還謀襲郡城神化婦人導叛兵食瓜田間食已  
皆昏迷失道至城而天已曙官兵有備遂伏誅此皆彰  
灼可徵之大者而疾癘旱澇之禱為尤驗固未易悉數  
也今觀事幸復乎故皆神靈之所致顓并記之濂曰婺  
女之於茲郡猶參之於晉陽辰之於商丘固宜祠而祭  
之然惟有國者得祭禮也民之祭者情也先王之教謹  
禮而不違民之情一乎禮則拘專乎情則濫在人折衷

焉耳且田祖先嗇民以其有功一執七猶思之祭之况  
昭囿于天恃賴以為司命者乎說者乃謂自南斗十五  
度至婺女七度為星紀吳越之分皆屬焉何獨婺之人  
得專祠婺女乎是不然吳越之分固廣而斗牛女之所  
該亦廣苟以纏度細推之郡之墟正上真於婺女爾星  
之降祥焉可誣也道可等劬躬焦思而盡力於神無非  
為民祈福濂如其請特載星之威靈不測者為詳所以  
起州民之瞻敬而俾繼承於無窮豈止述起廢之功乎

道可字南峯郡人也冲默而契道嗣天師畀以崇真明  
遠宏道法師之號云繫之以詩曰

帝居冥寥天中央宰制萬有御陰陽經乾緯坤翕以張  
百靈環衛燦文章交泰洞射下土方州分國列奠厥疆  
須女下流婺適當赤光熊熊吐寒芒名州建宮自隋唐  
厯年百千氣愈亢神宮巍然逼玄蒼彤楹文戶紫檀房  
高閣飛甍穆煌煌神君之來天門黃電母雷師翼兩旁  
麒麟駕輶虹霓幢羽衣絳表雲錦裳凍雨灑道塵不揚

清氛龍人靈始降即之若無視洋洋山君海王修典常  
執玉來覲歲相望奉帝威令俾勿爽鯨鯢戮死魑魅箴  
耆耄有時告雨暘麾箕舒飈畢沛滂原多黍稷隰有杭  
地寧天清民樂康誰其尸之神降祥嗟爾黎庶德是覆  
善錫鴻慶慝被殃神靈秉握帝紀綱帝有正命莫敢攘  
攘之以私帝所戕神理惚恍誰能詳史臣作詩匪昧荒  
金石可渝斯不亡

溫忠靖王廟堂碑

歲在閏逢涖灘斗杓直寅其日某家子東家道士儲祥  
曦新作溫忠靖王廟成後十有一年太史氏濂為之記  
曰太虛之間一降一升而能橐籥於無窮者非氣母也  
耶氣母之所孕其出無根其入無門而其應也甚神人  
能察乎陰陽之變而不凝滯於物者其知鬼神之情狀  
矣乎王姓溫氏名瓊字永清溫之平陽人父民望嘗中  
明經甲科年耄無嗣與妻張道輝晝夜顙於上帝一夕  
張夢一神手擎火珠自天門而來謂曰吾乃大火之精



將降胎為人張覺赤光被體中猶喜喜然因有姓以唐  
長安二年五月五日午時生其左腋有靈篆二十四右  
半之七歲習禹步為罡十四通五經百氏及老釋家言  
二十六舉進士不第乃拊几嘆曰吾生不能致君澤民  
死當為泰山神以除天下惡厲耳復制三十六神符授  
人曰持此能土地上鬼神言已忽幻藥叉象屹立而亡  
蜀葉天師後用其符禁除沴氣之為人留者彷彿見王  
衣赭袍握寶劍乘追風駿下之劾名之家遂皆祠王以

祈靈響焉王初封翊靈昭武將軍正佑侯其曰正福顯  
應威烈忠靖王則宋季之累加也王之事行見於傳記  
者如此自薦紳先生言之可謂怪神之極殊不知氣母  
之所孕入奇出神靡所不有蜚龍感而異人生玄象應  
而神蹟著蓋不可一二計惟夫偏鑿或足以病民故必  
降剛明方直者而祛斥之此亦天之恒道非所謂怪也  
古之聖神體天以訓民鑄鼎象物使民知神姦故入川  
澤山林魑魅魍魎莫能逢之奈何氣漓俗微御陰陽通

神明之術不傳方士之徒遂得竊其機權而用之世之  
昧者不知出於古聖神遺法咸歸諸道家往往鄙其謫  
誕不經嗚呼是果謫誕不經者耶非耶系之以詩曰

南離有赫大火神下上六氣凌三辰靈龍築輶輔以雲  
被髮下降瘡海濱帝出乎震物以伸約束百鬼主地門  
神往從之勢翩幡豹韃絳衫紫纁巾七斗直劍火暈輪  
嶽祗瀆鬼爭駿奔厲或憑人叱使泯弼贊玄化歸一鈞  
東嘉之山翠嶙峋作宮翼翼鸞鳳騫牲牢充臚酒鬱煴

挺然正氣扶乾坤山明澤媚日燕盥

獅子山徐將軍廟碑

帝王受天命而興默運玄化施陽斂陰日月為之却行  
山嶽為之震疊川君水伯咸聽其命令而效職獻靈理  
勢則然也今皇帝之都金陵伐亂討逆遣將出師旌旄  
所向鉦鼓所戒巨城大邑無不降順時則有若徐將軍  
者亦著神功將軍烏程人晉時行賈江淮間道廬之巢  
湖溺死死而為神巢民奉之甚謹上初渡江諸將多祀

神舟中所向克捷成功事聞於上歲戊戌某月命南安侯俞某即龍江盧龍山為廟祀焉擇清修道士汪與權駱德輝徐善誠三人主其事及既登大位之六年為洪武癸丑九月大駕幸盧龍時與權已化去詔德輝葺廟室樹名木且勅改盧龍為獅子山德輝等承詔奉祀益恭甲寅某月復相與建祠奉其教所謂玄武神於廟左殿堂門廡畧具咸以為斯廟與國同興將軍之功格知帝主耿耿不誣其本始固不宜無考而玄武之祠威靈

日著亦宜率聯得書乃來請銘其銘曰

帝興江淮賢豪景從叱咤而雷麾斥而風豈惟人同鬼神爭助水伯川君罔不來赴維巢有湖神之所都陰翊王師翼鼓龍旗敵城額額大將攸克示以神兵暗禡其魄軍聲如霆目無全城一日十勝斬冠率平帝詢將臣成功孔速疑有神助使之順伏將臣有言非惟戰功維巢有神實張兵戎帝曰異哉何以勸賞爵非所安俾其廟享龍江之陽山迴岡翔作鎮於京以綏四方有廡有

堂有筵有几神之戾止冷風如水都人來觀天子聖仁  
天子褒功及於鬼神都人來言神之威武洞於幾微以  
佐明主上天垂象龜蛇合形佑我下民功尤難名並洞  
實宜精神上通合慶同體以贊化工時清歲康烽燧不  
芒都人薦奠粢稷豆觴人神相依其德弗陷於千萬年  
彌久彌昭

温州橫山仁濟廟碑

記禮者曰能禦大菑則祀之能捍大患則祀之先王之

制非惟崇德報功以垂勸於方來亦所以達幽明之故而察鬼神之情狀蓋受氣之剛大者決不隨物漸盡其能警動威靈以錫美萬民乃其理之所有學者多疑於鬼神遽絕謂無有夫豈可哉有若橫山廟神之事其明效可睹已神諱凱字公武姓周氏世居臨海郡之橫陽生而雄偉身長八尺餘髮垂至地善擊劍能左右射博文而彊記家雖貧躬耕以養父母及司馬氏平吳與陸機兄弟入洛張華薦之神知晉室將亂獨辭不就時臨



海屬邑曰永寧曰安固曰橫陽地皆瀕海海水沸騰蛇  
龍雜居之民罹其毒神還自洛乃白於邑長隨其地形  
鑿壅塞而疏之遂使三江東注於海水性既順其土作  
人永康中三江逆流颶風挾怒潮為孽邑將陸沉民咸  
懼為魚神奮然曰吾將以身平之即援弓發矢大呼衝  
潮而入水怒裂開雷光中見神乘白龍東去但聞海門  
有聲如雷而神莫知所在矣俄而水勢平江禍乃絕邑  
長思其功號其里曰平水且建祠尸祝之祠初在城之

西郊及更永寧為永嘉郡郭璞相土遷之於西洋遐邇  
徼靈者無虛日神功益用赫著陳至德間閩寇章大寶  
侵分水嶺其氣勢張甚民爭遁逃神見天兵於雲間戈  
甲耀日盜驚而潰唐武德中輔公柘為亂其黨入寇民  
依華蓋山築城而拒守之時當嚴冬神降大雨雹寇弗  
敢近城因得不陷天寶中河決澶州怒暴不可制神見  
黃旂驚濤間河復故道光化末天台大饑神化形為商  
載米貸人已而投杖於江變成赤龍騎而升天宋景德

初契丹同其母蕭氏南侵丞相寇準殿前指揮使高瓊  
奉真宗親征車駕過河幸北城天際見力士數萬旌旂  
上髣髴有平水王字虜懼請盟而退大中祥符初詔營  
玉清昭應宮取材於溫之樂成使者以重山不可致走  
禱於神忽風霆凌厲龍湫震盪巨石皆起立大木斯拔  
蔽江流而下神之靈異或見諸紀載或相傳父老之口  
如此者蓋不一而足今則粗舉其槩而已神初封於唐  
為平水顯應公尋陞王爵賜袞冕赤舄宗累加通天護

國仁濟之號從祀郊壇兼賜仁濟以為廟額元復加成  
惠進封大和冲聖帝遂易廟為宮逮入國朝壹以誠事  
神以為數加溢美之辭非所以敬恭明神詔禮官定議  
為橫山周公之神至於廟宇之建脩皆郡守任其責可  
考見者自陳毛喜逮元左荅納失里凡一十三人云昔  
者大禹當洪水橫流之時隨山刊木奠高山大川民始  
得平土而居千載之下觀河洛者必思禹功而弗忘天  
衷民彝其不可泯也如此若神之為憫生民之昏墊奮

身而興捍患禦菑蚩蚩之民得遂桑土既蠶而不混為  
魚鼈者果誰之力歟夫禹之功在天下神之澤則被乎  
一州雖有大小之殊其惠利萬民之心則一而已廟而  
祝之誠合先王制禮之義孰謂非宜州人士永嘉教諭  
許士宏訓導張升恐無以示來者介鄉友秦王府紀善  
林君溫徵瀛文勒諸樂石瀛既為序其事復作歌一篇  
使邦人歌以祀神其佐神張鉉字子元郡人由右科進  
士仕至閤門宣贊舍人剛烈正直嘗上疏言事忤史嵩

之被斥而歿既歿而顯靈太守吳泳因并祠之法當附  
書文中歌曰

東甌之地大海濱止斥鹵噴蝕成荒堙止有時魚龍或  
怒嗔止蹴翻巨浪高嶙峋止懷襄勢殷莽無垠止惟神  
我憫眉屢顰止帥衆疏鑿不憚勤止夜後陰兵直達晨  
止三江順流若拖紳止盡化魚鼈為衣巾止一旦颶母  
號秋旻止江流逆止波揀雲止城廬沉溺在逡巡止神  
知事急如救焚止彎弓注矢肯顧身止眼不見水唯見

民止衝濤直入勇絕倫止海水壁立左右分止赤電飛  
射光相燉止神乘白龍赴海門止號號似聽驚雷奔止  
水禍頓弭神具欣止有室堪居田可耘止斯言曷以酬  
大勛止有廟肇祀西洋濱止漸周吳越泊七閩止神功  
彌盛海寓聞止天兵建隊向空陳止旌旗上著鳥篆文  
止虜氣驚盡去鮮屯止况茲狗鼠視欲吞止河道遙復  
流沚沚止投杖化龍靈跡存止疏封直至帝王尊止冕  
旒袞衣佩璫璘止神之正氣塞乾坤止下上日月摩星

辰止玄化沕穆合神人止甌民戴神忱且恂止遐邇奔  
湊川之臻止如見靈旂降綰紵止牲牷肥腍酒芼芬止  
驅斥厲鬼忝稌蕃止太史造文勒堅珉止後千百載期  
無諼止

淵穎先生碑

浦陽江之上有大儒曰淵穎先生吳公以精深玄懿之  
學發沉雄奇絕之文闔陰闢陽出神入鬼縱橫變化其  
妙難名生雖弗克顯融以伸其志既歿而言立浩浩穰



穰其書滿家信一代之偉人足以播芳猷於弗朽者也  
先生諱萊字立夫姓吳氏其先毗陵人一遷於番禺再遷  
於睦三遷婺浦江之新田唐乾寧初有諱公養者又遷  
縣西之具溪實德政鄉尊仁里也高祖諱聞贈中奉大  
夫福建道宣慰使護軍追封渤海郡公妣盛氏追封渤  
海郡夫人曾祖諱蕃累贈資善大夫太常禮儀院使上  
護軍追封渤海郡公妣沈氏追封渤海郡夫人祖伯紹  
累贈翰林學士承旨榮祿大夫柱國追封渤海郡公妣金

氏追封渤海國夫人父諱直方集賢大學士榮祿大夫致仕妣盛氏初盛夫人懷娠始七月翰林公忽夢西域神人飛空而來直止夫人之寢心異之越翼日先生遂生因名曰來夫人頗知書年四歲授以孝經論語春秋穀梁傳隨口成誦七歲善屬文有奴僕命騷之言品南先生方公鳳見而奇之曰此邦家材也取南山有臺詩中語更今名族父幼敏家素多書先生時出與羣童教私挾一編以歸盡夜讀竟又復往易或以聞於幼敏迫而

觀之乃班固漢史也幼敏指谷永杜鄴傳謂曰爾竊觀  
吾書能記是當不爾責先生琅然誦之至終篇一字不  
遺幼敏以為偶熟此卷三易他編其誦皆如初乃盡出  
所藏書畀之讀崑南益異之許以孫女妻焉且授易書  
詩三經義暨秦漢而下詩文章大家先生一覽即悉其  
指趣崑南退謂人曰明睿如吳某雖汝南應世叔政不  
足多也自是以來先生博極羣書至於制度沿革陰陽  
律歷兵謀術數山經地志字學族譜之屬尤無所不通

矣時朝廷將有事於東陲即自奮曰此小醜耳何必上  
勤王師使某持尺書諭之足矣因撰疏論其事會病不  
果上延祐間貢舉法行有司以先生名上豫章熊公朋  
來巴西鄧公文原及吾郡胡公長孺主去留士此三數  
公輩行老成學術淹貫自非博古該今明體適用咸懼  
不得在茲選而先生與焉於是東經齊魯梁楚之郊北  
抵燕每遇中原奇絕處輒瞪然長視平岡灌莽一望千  
里昔人歌舞戰爭之地壹皆前迎後却畢在塵沙霜露

中遂與當塗李翼餘姚方九思臨川傅斯正貫酒高歌  
天寒風急毛髮上豎自謂綽有司馬子長遺風尋以論  
議不合於禮官退居田里出遊海東洲厯蛟門峽過小  
白華山登盤陀石著觀日賦以見志還寓同縣陳士貞  
家士貞之居與龍湫伍洩鄰榛篁蒙幕似不類人世先  
生日嘯詠其中暢然自得或至莫忘返游覽之暇不廢  
纂述重取春秋傳五十餘家各隨言而逆其意一以理  
折衷之譬猶法家奏讞傳逮爰書既得其情而曲直真

偽無所隱至若繁露釋例纂例辨疑微旨折衷權衡意  
林通旨之類皆有論著復謂孟子乃亞聖之大才司馬  
遷不當使與鄒衍淳于髡慎到荀卿墨翟尸佼長盧同  
傳因刪去諸子益以萬章公孫丑之徒作孟子弟子列  
傳古今樂府不同郭茂倩不當但取標題無時世先後  
就其所次辨其時代使各成家名樂府類編古之賦學  
專尚音律必使宮商相宣徵羽迭變自宋王而下唯司  
馬相如揚雄柳宗元能調協之因集四家所著名楚漢

正聲其他著述若此者衆不能殫舉也四方學士慕其  
聲光多負笈從之游先王遇之恒若撫子姓羞服有不  
給者周之監察御史許君克學行部浙東以茂才薦署  
饒州路長鄉書院山長未行而疾作裏風挾疹其血交  
襲顏面壅黑兩脰罷屨不可越戶限重紀至元六年先  
生年四十四棲遲社席愈不自振忽夢作童汪跼贊覺  
謂人曰汪跼殤者也予自嬰疾以來何藥不嘗而勢草  
若此今歲殆不起耶夏四月九日竟卒於家遺命治喪

不用浮屠法諸生胡邦翰鄭銘等來襄治後事二子士  
諤士謚以至正九年十一月二十四日奉樞宥鄉之盍  
塢去家南五里而近及門之士以其經義玄深而文辭  
貞敏也私謚曰淵穎先生郡太守縣大夫復各祠之於  
學宮云先生自少有大志專思澤物不欲以文士名每  
慕張宣公為人推明義利雖一毫不苟取表裏一致與  
人游驩然有恩愈久愈固身雖羸弱若不勝衣雙瞳碧  
色爛爛如巖下電見者改容鑒裁精絕人以古詩文試



之先生察其詞氣即知其為某代某人所作當其賦咏  
捷如雨風一日於故人家見几上堆剡紙數十番戲為  
長歌頃刻而盡屬對嚴巧文采縟麗觀者驚以為神謂  
非人所能及所著書有尚書標說六卷春秋世變圖二  
卷春秋傳授譜一卷古職方錄八卷孟子弟子列傳二  
卷楚漢正聲二卷樂府類編若干卷唐律刪要若干卷  
文藁六十卷別如詩傳科條春秋經說胡氏傳攷誤未  
完夫自文氣日卑士無真識徃徃倚人之論以為低昂

其惟古之作者則曰雄渾瞻富惟有漢之文為然淳質  
雅奧亦唯有漢之文為然今之從事藝文者如之何可  
及也嗚呼豈其然哉苟以先生諸作置之司馬遷相如  
劉向王褒之間吾知其未必有媿也第以數與時違弗  
沾一命以至於死不大顯白於世所幸雄篇鉅冊彪炳  
烜著有如日星尚當藏諸名山以俟後世之知楊子雲  
者銘曰

大火燁燁司於南辰重明宣昭神之伸也有赫厥靈郁

紛輪囷敷為至文降於人也斧藻交橫黼黻斯皇變化  
凌厲動無方也雲流焱行品彙咸亨於燧其光霽無聲  
也胡積之腴不顯其施返於混茫朱鳥之區也騎箕之  
精上為列星發天之符合地冥也石室之藏雄文吐芒  
鬼神呵衛禁不祥也泰華嶙峋長河翰沄永世有耀與  
之俱存也

吳先生碑

元國子博士吳先生既卒三十有七年其子今翰林待

制沉告於太史宋濂曰先君學行海內靡不聞之然知而尤詳者莫如鄉人鄉人知者衆矣好道而諒直者宜莫如子圖其傳俾久弗忘非予之屬而誰屬濂於先生固弟子行幸執筆從士列咸餘教所暨且與沉友老矣寧敢卒辭先生吳氏諱師道字正傳婺之蘭溪人少勇於學不督而勤始為文辭輒驚駭長老未冠讀真文忠公書大悔初所為非是即以聖賢自師時許文懿公以朱子之學淑善者先生持所悟識造門質難許公甚禮

敬之授以所受心領意繹日開歲化斂戢充擴刻削就  
規矩熒然有聞於時至治元年舉進士登科授高郵縣  
丞階將仕郎漕渠決泛原陸漕不通先生集工隄之三  
年以外艱歸服除改寧國錄事轉從仕郎天厯元年徵  
江淮兵過郡將弗檢下兵白晝揮刀戟走市怖人致貲  
貨不與繫楊道上縱火焚廬舍橫甚自郡守以下皆畏  
噤不敢治視民感若不知先生曰兵無狀賊天子民不  
治且不可制索馬從數卒行市捕得縛市門榜掠令衆

衆譁操仗呼曰何錄事乃敢爾吾曹死耳不忍為人辱  
必殺錄事先生聞之獨出喻其衆曰錄事儒者易殺敢  
殺者來錄事不汝禦也衆睨眙不敢有言退相戒曰他  
人易凌慎勿犯吳錄事明年飢先生平價勸分得粟萬  
餘石食城中民既而宣城民仰縣官分者三十三萬口  
廉訪使者以先生能吏檄攝縣振飢悉召大姓第其家  
為九等出粟有差得三萬七千六百石飢者以不殍死  
又明年春未麥先生白廉訪使者請諸朝發官廩十萬

計使者亦遣掾吏出貸旁縣復獲鈔數萬定選廉察吏賑民先生任三之二籍民爲曹伍以次呼名受錢粟襁負充庭中若無一人然有既受而易服重至者先生目吏取其人於衆中詰之具伏左右相顧疑爲神明居五載條教脩完事治姦息廉訪使者薦於朝以疾引歸重紀至元之初遷文林郎池州建德縣尹新孔子廟堂廣學舍豪氓侵郡學田七百畝郡下先生問狀按圖繩豪民歸諸學建德非茶區民苦茶稅先生言不便報減稅

民賴之中書左丞呂公思誠侍御史孔公思立薦先生  
經行高宜爲人師召入爲國子助教階承務郎踰年陞  
博士進儒林郎先生聲著中朝者久士子聞先生至喜  
曰是婺吳先生耶相率持所疑指問開以機鑰皆歎服  
去先生因推所聞陳說誨誘端簡嚴肅經義一本朱子  
排斥異論有詆朱子者惡絕弗與言初許文正公衡在  
成均時宗朱子以爲教其法具在先生守不變學者信  
嚮如文正時禁林近臣復薦先生才任脩史未報至正





無時不觀故無所不熟涵畜淵邃不可涯涘爲文務自理出暢而不繁崇而不矯有蘭溪山房類稿二十卷易書詩皆有雜說通十卷戰國策校注十卷絳守居園池記校注一卷敬鄉錄二十三卷自聖賢之學不傳篤信者失之拘而不適於用喜切者失之詭而不合乎義二千年間非無豪傑之士而功烈不少見於世者不以斯耶宋之君子後先繼出推明闡抉疏闡扶樹理無不章事無不脩雖聖賢復生爲後世計無以加矣然而卒未

有繇其說而大有爲於天下者豈非有志者鮮哉先生  
蚤有所聞尊而行之守道而不遺乎事致用而必本於  
道施其緒餘於郡邑已足以震耀當世使假之以高位  
而獲大行被其潤澤者夫豈細哉卒止於斯謂之天也  
非耶雖然觀其所自立不既偉矣夫銘曰

聖學之傳猶日麗天光華赫如照被八埏有足者行有  
目者覩致用成功咸以日故使日自明明不照物雖曰  
行天何取於日其或善燭而不能遐如膏與薪厥功幾

何道積於躬用見乎世微之一毫大之無外在聖有作  
佐商造周天包地含嶽立川流區區霸功實悖於道卑  
曲偏岐膏薪之耀歷世二千濫洛擴之有支而南考亭  
拓之夷其榛荒亦有車馬有駕而行可盡天下彼惛不  
白狹徑是趨彈其智能陷於泥塗惟發有傳考亭之適  
先生是承孔武且力涵而俾深植而俾成濯其光晶有  
燧其明始奮而仕不辭下位道無損精崇庫一致繩豪  
鋤強煦其弱羸父嚴母慈亦作之師廷臣咸言其道可

數帝曰汝來掌我邦教有肅威儀有秩詩書大帶玄端  
開陳聖謨使陟而升可澤四海世方仰之曷爲不待不  
顯者身道則不亡遺書滿家百世彌章世觀其書將考  
於爲勿謂易知斯道在斯

黃文獻公祠堂碑

星辰之昭乎上者天之文河嶽之列於下者地之文經  
緯乎兩間而不昭至道者人之文人之文雖若有不同  
或得之者亦足以配二儀而常存後萬物而弗凋蓋以

長庚之精峨眉之神皆降而爲命世之神所以能軋摩  
日月扶植鴻化以震盪乎一世故雖其魄已喪其神不  
亡乘一氣於太虛間鼓舞變化隨雨露風霆而著形焉  
尸而祝之實有不得不然者矣有若烏傷黃文獻公其  
殆庶幾乎公之方妊母夫人夢大星煜煜然墜於懷及  
其生也繡川之水爲之一清是盖星靈川祥所融凝而  
成者故公遂以文章鳴一時侍講經筵闡明聖學掌宣  
皇制黼黻太平昭回雲漢之章衣被乎草木人文化成

之效於斯爲盛是則公雖薨而其耿耿不沒者固將游  
神太清在帝左右而祠之不設非甚缺典歟濠梁胡侯  
惟信來爲縣剛明正直不可干以私行之既久政通人  
和屢謁公之墓下涼颼動木悵然而有遐思即下令禁  
其樵採復輯公之遺文刻梓傳世侯猶謂未足以交神  
明乃請於上官築祠於繡川之濱堂庭穆如門廡清謐  
象設有嚴丹雘焜耀落成之日侯具牲酒盛服致祭公  
之孫子邦之羣彥咸從侯後精誠格孚契乎冲漠烹蒿

悽愴如將見之祭畢而燕籩豆靜嘉肴核維旅鴻休誕  
昭秩秩雖雖四方之士來游來瞻僉以爲侯之爲政知  
所風厲而公之靈爽永有攸棲矣或者則曰人死則其  
氣斯盡古者祭鄉先生於社不過崇德報功爲人勸爾  
子曰其神不亡無乃涉於誕耶曰嗚呼是未知鬼神之情  
狀者也世之強夫志士用物精多尚能昭著靈響廟  
食百世况鍾天地靈長之氣而發爲文章之英者乎其  
不隨世而磨滅者決矣至若庸人凡氓其德不顯其鬼



不靈則當如此言爾初祠之成同門友王君禕既爲紀其歲月公之子梓從子樗從弟拱謂侯是舉有關於名教之重而非私於一家又請濂詳文其事於石以昭侯之善與此祠相爲終始濂按春秋書事之法辭有重複而不殺者因竊取斯義而爲之記復繫之以詩曰

大星煜煜流光晶川后歛滓若鏡澄發爲五色文章英上騎日月薄大清呼吸雨露鞭風霆在帝左右持文衡交龍降井藻火明生色燦爛丹鳳翎萬物承被流華榮

一氣闔闢不可名玄功歛迹歸杳冥其魄雖離神則形  
炯炯直與元化并有祠翼然安幽靈陽烏高騫聳觚稜  
庭宇沕穆森巨楹歲時奠祭輸精誠牲牷肥腍酒潔馨  
倏陽忽陰誰使令有神來下風泠泠若乘玄麟紫霞輶  
降雨百福響然憑鄒魯禮樂當淳興春秋報事垂千齡  
門人前史官金華宋濂撰

官巖院碑

浦江縣東南三十五里有山穹然拔起於衆峰之間者

曰康侯山又曰官巖山俗以其形蹲踞如獅子又稱之  
曰獅子岩從岩趾斜入六百餘步崖木回環最號幽邃  
有古招提在焉梁大同間比丘尼元淨始建院岩北石  
洞前號曰安和後更名兜率至唐會昌之季燬於火其  
故基至今猶存咸通初祖燈大師自越之上虞飛錫而  
來遂縛禪岩內會歲旱獨上絕頂祈請捐身投崖下而  
卒俄頃大雨火化得五色舍利民感之就岩之西爲建  
今院八年丁亥因山賜額爲官岩云燈之事脩載洪遵

郡志中而比丘之經始則出於縣民蔣氏之所私紀年  
世遼邈莫考其詳所可考者宋大中祥符癸丑重建釋  
迦寶殿天福己未刻木爲儲菩薩護法神王諸像景定  
庚申妙空大師智印嘗出主杭之旌德顯慶教寺以衣  
盂之資命其徒六人造經鍾二樓暨圓通堂方丈三門  
兩廡之屬復聞於朝以奉仁烈皇后楊氏神御院益增  
重國朝廷祐丙辰院僧宗勝建普賢大王閣明年丁巳  
宗尚悉易殿之楹楹新其四檐而加闢焉復搏土益舊

木像礪石爲牀座而安寘之使與殿稱至順壬申景輝  
作潮音堂於殿之北牖至正癸未畢光寶閣成越三年  
丙戌集僧之堂又成明年丁亥香積之室又成其費一  
出於衆僧唯閣之役頗殷賴邑人姓洪君榮助之而始  
就榮之二弟盛興復爲創鷲峰潛碧兩亭自是院之規  
制一如大伽藍四方人士來觀來游但見穹樓傑閣飛  
動於蒼烟涼翠間恍若登耆闍崛山親逢如來法會之  
未散莫不驩欣贊咏得未曾有比丘普安曾不以是爲

既完且謂自祥符癸丑至今歷三百四十有三年其中  
更幾世幾人始克致有於是苟不圖文刻諸貞珉則後  
來者何以知其艱哉乃以烏傷朱君烈所述顛末走青  
蘿山中而求濂爲之記濂所居距岩不十里而近一出  
戶輒望見之當天朗氣清時嘗同二三子捫蘿攀葛而  
上俯瞰縣北岩坑仙華諸峰如萬馬東行或駐或躍而  
浦陽江之水蜿蜒蜿蜒又如白龍南飛一瀉數十里遶  
岩北而去周圍原野星羅棋布諸池沼廁其中直小甌

耳方呼酒放歌天風自東北起四山鱗甲一時皆動同  
游或戰掉不能留誠天地間勝絕之地也宜爲有道浮  
屠之所都而興仆補壞代不乏人也漁因弗辭而爲之  
記系之以詩曰

獅子之岩下瞰巨江涵靈茹飮吐納陰陽其一不有大雄

曷擅竒絕平地湧成琉璃宮闕其二誰操化機寂我鼓鍾

若龍若象遯棲無蹤其三有大導師飛錫而至以清淨身

化爲甘雨其四我民咸言蓋報有年一彈指頃樓閣現前

其歷年四百何以弗墜世有長材愈作愈麗其六陽馬四

騫觚稜高翔金浮翠流輝輝煌煌其七觀者如登妙莊巖

域見種種光暨種種色其八惟世間相起滅弗停中不滅

者永劫猶存其九矧是有爲俱繫虛妄當悟以心毋取於

相其十若事若理本無二門苟涉分別即非一真其十一我迷

我文鑄諸堅石後千萬年與山無極其十二

神仙宅碑

處士之州並城三里所有山曰少微山之下有觀曰紫



虛觀之南一峰巉然挺出曰眉巖西南諸山拱挹周衛  
而二水蜿蜒起伏來匯其下登高望之萬象呈露儼若  
天開圖畫不知者以爲真蓬壺員嶠之絕景也宋南渡  
後仙翁章思廉自遂昌紫極壽光宮來隱觀中蓬首垢  
面日初升輒東向吐納凝然澄坐久之絕粒唯日飲水  
一盂形神分合人莫測其變幻乾道丙戌冬沐浴坐蛻  
肌膚柔潤如生弟子瘞諸眉岩下後有見於濤江之濱  
手携一鳥飄飄然溯風而行衆異其事啓棺視之唯隻

履存焉先是主觀事者嘗作亭墓前壞於風雨道士王  
有大日徘徊其間悵然有上清笙鶴之思歸與其師梁  
惟適謀自墓左開曲徑一千餘尺直至巖顛誅榛剪荆  
造祠宇七楹間名之曰神仙宅中祠處士星及仙翁諸  
像東室曰芸香藏書其中西室曰橘樂爲娛賓奕棊之  
所宅之前二石岩拔起其蟠若龍其踞若虎各構亭其  
上左曰來鶴右曰留舄而山之景愈勝矣經始於至正  
丙午春三月某甲子落成於其年夏六月甲寅替其功

者楊一寧王性存也惟適復捐腴田若干畝歲收其入  
度子弟世守之介同郡吳府錄事吳從善徵予爲之記  
予聞括之名山上直少微天文家所謂處士之星也靈  
輝下燭凝粹數和修鍊者居之去滓穢而來清虛雖曰  
內功之加要亦山川淑靈所助爲多也今以紫虛言之  
徧游海內名山招白鶴而翩然化去豈無盧仲璠者乎  
道遇至人授以游戲翰墨之法卒吹鐵笛與之同往豈  
無徐虛寂者乎不止仙翁一人而已且琳宮秘館無處

無之何少微所照而超然霞舉之士至三人焉當有不  
言而喻者矣仙翁靈迹固不可不表見於世自非惟適  
父子篤志玄學孰肯一顧於寒烟衰草之墟哉化荒曠  
而爲居處功亦大矣脩真之士當世繼之俾勿壞可也  
嗚呼塵坭膠葛予不知秋髮之被肩安得攀仙翁之逸  
駕共吸沆瀣於寥陽之上耶惟適麗水人宋戶部尚書  
汝嘉諸孫有大青田人亦簪纓家能文辭及隸書皆高  
士云系之以詩曰

少微之星熒熒垂芒降魄名山充鬱沛霧結爲靈和其  
中含黃覓之無形發休吐祥孰其尸之有道之士來涵  
清寧度世不死瞰出東方其大如筵我啄其精以洗吾  
髓鍊虛凝真惚恍若神冠劍既藏神游江濱豈伊幻化  
身外有身出入河嶽上下星辰靈蹤猶存木老亭仆芳  
草離離誰復來顧有羈者士父子同慕皓鶴不來馳情  
雲路乃陟崇椒乃建瓊宮羽蓋飈輪庶或一逢靈風冷  
然白日正中溟滓無際遐思何窮况乎遙矚境與心會

羣峰攢監二水縈帶萬象粲然如列珠貝一歟歆間賈  
超物外巖巖者山匪仙不名不有玄構曷棲其靈水火  
有鼎龍虎有經疇非采真浮游黃庭神君捧劍鬼伯持  
戟呵衛弗祥固此仙宅法古爲碑麟迴鳳翼太史勒辭  
式昭罔極

風門洞碑

神者變化不測之謂也凡不測之所必有神司之天之  
高且明不可測也地之廣且厚不可測也故天有帝地

有祇嶽鎮海瀆其崇深幽險曖昧惚恍不可測也故皆有神爲之主名山經所載五千三百七十山其神有龍身而馬首者有牛身而足肆貳首而馬尾者有身如蛇鳥而豹尾虎齒者雖譎誕難徵然不可測之所其神亦變怪無常要不可以常理論也金華縣東南五十里有山曰風門山有石洞洞之戶可入二人其內晦如漆人怖不敢往以石投之有聲礧礧然莫測其所底止風蓬然從中出襲人毛髮盡豎鄉民異之意其必有神歲時

禱祠之多應因號之曰風門洞神久而神與人益習因降於巫言生四子皆爲神民信之遂即洞西一里所西溪之原爲祠以像神及所謂四子者其來蓋已久元至正丙午夏旱民皆走祠下爭舁其像以歸像至之鄉雨隨以至否則咫尺不相及民益大驚不敢慢而琴山里浦二處之民事神尤謹惟恐失其意初里浦民嘗有神次子像靈甚至是歲琴山民迎禱之得雨而里浦不雨里浦人曰我神也奈何澤琴山而遺我乎遂欲舁去琴



山民亦曰我神也神澤我我未有以報請緩之相持者  
頗久不能止則與之盟曰天雨則以神歸我已而里浦  
果雨歲以大穰乃還神於琴山於是琴山之民思報神  
惠復刻木爲次子別像而請邑士王閑碑神之休烈植  
之祠下明年琴山有秋而西溪螟爲災西溪民疑新像  
與碑不利也怒沉像於水而碎其碑沉像之歲西溪民  
大疫死者十七八神降言將盡殛西溪民民惶惧殺牲  
叩首請爲像以贖辜隊具將樹碑而文已毀琴山士愈

慶乃來言其故請文刻之噫斯事亦異於常理矣然非  
果異也木石之怪久而不散且能爲災警華人况大山  
穹谷之靈乎其能出雲雨爲休神不可測度固其常也  
民祇奉之至於爲祠設像亦事之必致耳夫豈不可哉  
或與之抗則過矣準禮山川能澤物者則在所祭如神  
者澤茲邑之民而享其奉非濫也宜也爲之民者烏不  
敬乎系之以詩曰

風門之山蔚穹窿羣峰左右翼且宗勢若萬驥環一龍

帝恐地軸膠不通爲鑿巨竅貫其宵復驅后祗叱豐隆  
手鼓大塊噓雄風至今山竅如截筒有風泠然出其中  
下深不測上無窮幽怪宜爲神所宮惟神受命於祝融  
身騎赤虬搖綠鬋四子夾馳乘四熊川君水伯扈以從  
或珥青蛇持雨鏃或撼鼉鼓或震鏞忽陰倏陽互冥蒙  
喜則吐雲怒沅虹山民駭瞻增敬崇殺牲奠酒陳微衷  
願施霈澤回秋豐伐山築祠溪水東彩楹畫棟扉則彤  
縣民歲時來會同攜孩扶耄如聚蠶蒲伏裸獻罔不恭

有不恭者殃厥躬神爲帝臣秉大公願恢至仁綏九農  
聖經國典祠有功效高施博名必鴻鑄辭廟門玄碑穹  
著祥昭異警羣聳千秋萬祀爲神雄

惠州何氏先祠碑

英傑之士立大功而享爵位者非其先之基仁累善何  
能自致哉然其先有德而子孫不知報祀者有矣知報  
祀其祖而弃蔑其祖之子孫者有矣是皆不達禮義之  
弊也若山東行中書省叅政何公其篤於禮義者乎公

名真字邦佐世居廣之東莞至公始遷惠州祖諱發藻  
元贈中奉大夫廣東道宣慰使都元帥護軍追封廬江  
郡公父諱叔賢贈資善大夫江浙等處行中書省左丞  
上護軍追封廬江郡公祖妣鄒氏母葉氏皆封廬江郡  
夫人公祖暨父世有潛德鄉稱善士公生八年而喪父  
母夫人守志不奪慈鞠嚴教少偉然有志當元至正中  
中原兵起廣民王成亦搆亂公爲小官即請而討之已  
而鮮惠州之圍遂叛將黃常復思州會賊陷廣州公以

兵復之由衛州府判五遷爲江西等處行中書省左丞  
階資善大夫分省治廣公弟迪以從征功擢中奉大夫  
廣東道宣慰使都元帥兼僉樞密院事遂推恩封其二  
代後合福建江西爲一省改拜公資德大夫江西福建  
行中書省左丞仍治廣州歲乙巳九月賊挾廉訪司副  
使廣寧等叛圍廣公禦之踰十月部將與賊通絕糧道  
公出避城陷丁未五月復克之明年制授公榮祿大夫  
自左丞陞右丞未拜而皇明兵平江西詔至諭公公舉

廣東之籍以降上嘉公保民順命之績授中奉大夫江  
西等處行中書省叅知政事洪武庚戌移山東行省越  
七年以老致其政初公追思顯榮之盛由於先世既於  
東莞率族人建祠置田以祀羣祖復與弟迪謀悉以其  
先所遺田儲稅入以祭其禰公猶未慊於心乃以惠州  
城西之私第爲義祠并所有私田百餘頃爲義田世俾  
宗子主祀事恐族人不知學也有塾以教之恐其羞服  
或乏也有粟帛歲賑之嫁娶喪葬有以助之疾病疲癯

有以養之懼其久而失其意也爲書以訓之俾嗣弗壞  
而來請銘嗚呼先王所以親民善俗之道遠矣賢人志  
士欲推之於世而勢有所不能欲退而惠一族化一鄉  
而力有所不逮者有之至於勢足以爲而不爲力可以  
至而不至者亦有之此所以越數十世而其事曾不一  
二見也惟公奮自韋布夷盜保民鎮寧南服致位尊顯  
卒能識幾效順戢歛干戈爲民請命使粵南之民不易  
市肆又能推本反始孝於祖宗惠及族人所踐所言允



可爲法其於富貴可謂不苟取矣視彼恃險而賊民私  
厥身而忘其所自者其賢豈不多哉是宜紀行載勲著  
之樂石以爲後嗣式其銘曰

維昔至正德否亂生海沸山崩靡人不兵頌頌粵南在  
嶺之外猖豎嘯呼民罹其害何公曰嗟我民何辜告於  
大藩請行天誅迺戈迺殳迺糗迺糧大旆脩斯人莫敢  
當叛將肆凶賊我守邦鞭門疾呼鼠拱以降曷以褒功  
躋于左轄巨鉞良弓左旄右節豈惟其身錫爾祖考峻

爵崇勲以顯忠孝祖考榮矣子弟孔多寶帶銀章威儀  
甚都邦人聚觀拜伏稽首按轡徐驅詢其耆耆老有  
言大哉公勲元衰不君公其我臣公曰吁哉我志已定  
待彼有德爲汝請命赫赫大明泐泐仁聲震於南溟勢  
無全城公束干戈載封板籍錦韜龍函獻於京國帝嘉  
厥功不勞我師錫燕彤庭重瞳屢回大江之西岱宗之  
東祿食十年執政廟堂寅畏恭勤髯鬢盡白詔優老臣  
勿勞以職公嘆謂人我德何爲祖考之惠幸以弗隳豐

湖之西有第奕奕玄楹文牖既燭且恤亦有土田被隰  
包原重樛荐年歲登百千我第以祠我田以祀祖考之  
休敢恤吾嗣池有穹魚圃有嘉蔬以醢以菹丹荔清酤  
剗豕擊羊來蒸來嘗孫子咸臻有雖雁行或授以壘或  
奠以竿登降肅然莫敢叱咤數具禮全陳几布筵孰爲  
弟昆孰爲子孫公曰族人亦孔之夥揆本追原咸由於  
祖祖病在指四體靡寧奈何一身曾莫胥矜爾餒爾寒  
我有粟帛爾昧弗通我學爾迪爾有災害我則戚之或

有燕私則慶樂之我有爵祿我祖之故不私吾身弘祖之祐豈無鄙夫爵祿是荷惟家是肥遑恤其他維公克仁仁以保民惟公克孝尊祖睦親嗟爾後人惟公是師繼承無忘公有訓辭

臨濠費氏先塋碑

皇帝登天位之三年觀四方之既平嘉諸將之勲烈廼十一月丙申大封功臣爲公侯錫以鐵券俾傳諸子孫於是臨濠費侯自僉大都督府事進開國輔運推誠宣

力武臣榮祿大夫柱國平源侯既而復謂賢豪之生基  
德累仁必繇於其先乃推榮其三世侯之曾大父五一  
府君贈驃騎將軍都指揮使護軍追封靈璧縣子大父  
六三府君贈鎮國將軍僉大都督府事護軍追封江夏  
伯顯考七五府君贈榮祿大夫同知大都督府事柱國  
追封平源侯曾祖妣季氏祖妣及妣兩何氏皆從其夫  
爵邑爲夫人命書既下侯用牲醴詣五河告祭於先塋  
榮光赫然照燭泉壤山雲宰木飛揚燧奕皆有異氣自

是歲時奉祀惟恭侯間謂余曰吾世齒恒氓至於吾躬  
遭時遇主奮自我行奉命克敵或專或裨凡十八年始  
於江淮中於閩浙至於定中原舉關陝皆與諸將之列  
取城邑以數十計其艱且勤亦至矣籍聖主之德念錄  
微勞爵爲列侯名載冊書人臣之榮無所與比顧豈吾  
材之能致哉實我祖考遺休餘澤之所及也惟吾祖考  
皆有厚德爲鄉邦所稱宏址深源誕啟厥後恩數之加  
允稱不虛茲欲歌頌先德敷揚聖恩樹石墓道俾後嗣

知所自出非子孰宜余嘗待罪國史撰次功臣勞烈知  
侯爲人仁勇有智略事上御下以忠以誠今又弗忘其  
先以顯著遺德爲事可謂知所先後善爲臣子者矣侯  
名聚字士英其詩曰

帝乘六龍起江淮東濠泗之間爲漢沛豐維時費侯驅  
吼虎雄壯馬長矛爲帝股肱既定泗濱遂剗靈壁維滁  
及和一舉而踣孰謂大江可限南北萬馬飛渡不以羽  
翼巍巍建業扼江而城既入其郭帝庸作京廣德既綏

遂平長興軍聲轟轟四方震驚蠢彼僞吳假息於蘓愚  
弗量能自干天誅將命以行以剪以剗獲其大醜歸寘  
質鉄帝德如日愈久而晰孰倚冰雪以詫弗拔何閩何  
浙何勅何劣如朽之折如藩之撤閩浙既清載征中原  
巨壘連營望風而奔或奔或降追剗其根中原卒平萬  
方來臻帝嘉治平曰誰之功鐵券丹書錫爵命邦矯矯  
費侯平涼是封豈惟其身榮迨祖宗侯有峻爵上推於  
父維祖甚仁伯于江夏江夏之先靈壁是子旁及其嬪



咸有爵土費侯曰咨小子無良祖考之休積厚而昌既有土田又蕃牛羊維曰薦奠以致孝享大登如几牲碩酒旨費侯蒞祀陳豆奠聿擊鼓駭駭焚幣煒煒費侯克孝祖考咸喜濠民謂侯勇不失身委質聖君爲社稷臣濠民謂侯貴不遺親王佩貂冠爲賢孝孫四海既同爵勲既崇曷以承之維孝與忠忠以於朝孝以於家繼德無愆第祿是荷

天台顧氏先德碑

顧氏之系出江左其後遷金華尋復由金華徙天台相傳以爲顧歡之後歡梁之隱君子也故其地有顧儒嶺有歡溪然世遠宗堙莫能知其詳矣至宋南渡後有諱知言者字孚先通黃帝內經之學人有疾注藥起之無靳色會疫癘大興孚先裹良劑日巡戶而與之鄉人感其賜有搏土肖像以爲壽者以子貴累贈宣教郎生商卿周卿商卿字方子用薦者爲鄉郡學官遂以明經講授從之者皆爲純篤君子出言制行能使人慕豔不置

閥閥家綦氏伯仲爭以門資叙爵幾至破家方子片言  
喻之輒頓首謝過以官讓其兄周卿字成子擢嘉定癸  
未進士第官至朝奉郎奉國軍簽判初娶貴族施氏貲  
裝甚豐成子夜讀書隱几而卧施戲泚筆塗其面及覺  
大怒曰合奄未旬日乃敢爾耶所謂相敬如賓者何在  
坐以待旦斥出之再配楊氏無子抱方子之子育之乳  
因有潼方子孫玉文字溫夫咸淳甲戌武舉第一人授  
秉節郎殿前司同正將德祐丙子元兵入台執其父申

欲殺之溫夫抱父頸而號曰寧殺我寧殺我無害吾父  
溫夫被創而免因以跛廢初溫夫議娶應氏已納米忽  
折其脛衆勸之改圖溫夫不聽曰言猶在耳焉敢背之  
彼體雖虧而行未嘗虧何傷乎應後得婦道甚爲一家  
之師從兄壘翁死以孤子託之溫夫受經納配不翅已  
出者溫夫子鎔字可範年十三試藝鄉校頃刻而就人  
目爲神童丞相吳公堅以孫女妻之大母葉氏與其母  
春秋皆高可範先意承顏唯恐有不及兄鎬早世諸孤

咏咏然無依羞服婚姻皆可範主之然自宣教府君以下族屬頗衆正月之吉與日長至大合其族行聚拜之禮親之近者浹旬則一會飲酒哦詩情文藹如也有不至者罰及之凡遇疾疢死喪輒遑遑往視蹙額弗舒旦暮必謁先祠大寒暑不易人取以爲法焉家畜二猫皆孕一既產出爲人所繫未產者往乳之及其歸也同一窟而哺子人以爲和氣之應鄉井服可範之化苟有赴愬不之公府而惟其言是聽皆悅服而去里有陽歸堰

溉田萬畝當農功將興可範必繕築以利民糧書之脩  
閤師並緣爲姦利可範履畝而覈其實鄉鄰德之可範  
性端恪子姓有不善面折不恕然其律身尤嚴日抵暮  
輒懸燈書其言行於籍不可書則不爲年九十二忽無  
疾而卒惟天台素爲文獻之邦如南塘陳茂卿謙齋吳  
清之直軒吳直翁慥堂鄭景溫是四君子者皆與聞濂  
洛關閩之學故其鄉邦之間金春而玉應宮奏而商宣  
所以咸有士君子之操如顧氏一門是已然其嘉言善

行多可書已見墓文固可傳諸不朽其或聞之父老之  
口者歷年滋多恐日就泯泯族孫石樓縣令碩乃件繫  
之請予爲之記嗚呼世之求文者奚翅數百罔不欲譽  
己之善而於其先德則未嘗少留意焉碩乃能一反其  
所爲得非知識度越於人哉因不欲辭而書以遺之使  
碩之後人庶幾有所徵焉奉議大夫國子司業金華宋  
濂撰

龍泉章氏世系碑文

章氏本出姜姓世居於汴至宋兵部尚書巖永嘉初來  
守泉州始家於南安唐康州刺史及又自南安遷建之  
浦城及生福州軍事判官修修生仔鈞深沉有大度年  
踰四十尚晦跡弗仕當唐之季藩鎮爭強各欲致賢才  
以自輔有遣使來召者力辭不起乾寧四年福建觀察  
使王潮卒其弟審知代立即奉表修貢效臣子之職朝  
廷嘉之以福州爲威武軍拜審知節度使累遷同中書  
門下平章事封琅瑯王仔鈞以審知尚知有唐乃往謁



之投以戰攻守三策審知大喜執仔鈞手曰何相見之  
晚耶遂表聞於朝辟授仔鈞高州刺史檢校太傅西北  
面行營招討制置使選步騎卒五千命屯戍浦城西巖  
山南唐盧將軍假道過山下忽鼓譟來攻壘仔鈞堅守  
弗與戰遣二校邊鎬王建封求援兵建安仔鈞既退盧  
兵二校失期尚不至當處以軍法其妻越國夫人練氏  
諫曰世道方艱若二校者安知其不建功以靖亂耶仔  
鈞曰如廢法何練氏曰法固不當廢不若縱之使自逸

耳仔鈞仁其言而許之練氏使諸子喻二校曰宜急去  
毋受戮於市復以金條脫遣其行二校望拜感泣仰天  
誓曰夫人之恩苟不報有如日遂去奔南唐晉天福末  
審知子大閩皇曦與弟富沙王延政治兵相攻互有勝  
負延政遂稱帝於建州國號殷閩中大亂南唐闕其隙  
遣樞密院使查文徽及待詔臧循發兵取之時二校已  
貴顯爲行營詔討封爲先鋒橋道使共攻建州城陷議  
屠之時仔鈞已死練氏之子有官建安幕府者練氏因

家城中二校入城銜練氏舊恩獨以兵衛其門練氏曰  
汝今見報獨活我家耳豈足爲義耶闔城之人不下十  
萬未必皆有罪汝能全之乃爲報吾恩不然妾不能獨  
生也二校聽之一城生聚悉賴以完仔鈞生一十八子  
皆登顯仕其第三子銀青光祿大夫檢校司徒仁燧仕  
於南唐賜名曰獻誠慷慨有大節不屑細故思繼先緒  
若執玉奉盈唯恐墜仁燧生秘書省校書郎文錫當宋  
之初屯練民軍捍禦鄉郡盜不敢侵境時四方未寧名

門右族各風雨散去不相繫屬文錫一門二千餘指獨能聚居人稱爲東南第一文錫生都官郎中重性高簡超然不羣時伯仲列仕中外以百十數朱紫烜赫重獨棄官歸隱一旦獵於龍泉西寧鄉見山川明秀樂之復遷居焉重生告介潔不欲仕如其父告生順奉親極其孝諸弟從官各一方順獨戀戀居膝下跬步弗離親沒葬祭能中節順生公探與從弟知潁州衡尤厚善衡每招公探仕不應衡或強之輒曰使一家之道盡卽爲政

爾何必御朝署閱詞謀乃名爲政乎遇二弟友甚聲字  
氣洽如奏壘麓晚立祠以奉仔鈞神主帥宗人歲時薦  
饗士論多之公探生世安其友恭如其父建標慶庵於  
公探冢側中設仔鈞位而以公探配之世安生舉當文  
明極盛之世鼓琴誦詩優游自樂人或讓其獨善舉曰  
羣賢在朝海晏而河清矣奚必舉之出哉或仕或止各  
安夫天分爾舉生宗氣貌容偉能以寬柔之德被於人  
人宗生鄉貢進士輔履仁蹈義作事可爲師法輔生聞

義聞義生用之父子益雄於貲聞義所構室廬亭館甲  
於一州時具壺觴集大夫士其中共談古今治亂用之  
尤善述事動靜循矩矱不謬於度用之生強宗學該而  
文贍好購書籍凡四庫之目多蒐采貯藏子孫得以資  
其學業強宗生煥文愛施與寒沍之時憂閭伍艱食升  
樓遐望有晨煙不起者常召與粟與物交無忤意從弟  
某負氣每媒怨於人煥文晝寢其池亭怨家意從弟也  
持斧入欲斫之忽池魚躍水濺煥文面急驚起怨家流

涕謝曰幾誤害善人從弟之難因藉之以解踰數年煥  
文復遷錦州依婦翁以居煥文生斯立通象緯堪輿家  
書及素問靈樞之學日以利濟爲務醇熙和比絕無怨  
惡於人其言呐然若不出諸口而德容充浹見者驩然  
親之斯立生格局度凝廓壹以儒術自娛自入國朝益  
斥屏聲利高蹈物表白髮蒼顏衣冠偉如亦多注善藥  
以醫疾病疔傷者誓不求償父老踰八十不良於行雖  
僦媵之多格朝夕扶持左右未嘗遠去父既歿奉其愛

姬如母近屬有利格多金者數至豪奪格咸弗與競居  
亡何又倚官中勢鉗劫之格曰君何必爾欲金當持去  
又弗與較乃大慙服不敢復有所侵格生遇孫燕居危  
坐肩背不傾側雖不務榮進與人鮮患之志耿耿自信  
有赴愬者慙惻爲陳利害理即曲頰首免冠請自新旱  
澇疾疫必身禱禱輒應鄉人士服其言行稱之曰長者  
其嗜文學孝弟事如嗜厚味弗之厭每舉以厲人遇孫  
生珪璋溢珪璋皆有隱行溢多雄才丁搶攘之時集兵



以退羣寇縣賴以安尤尚伊洛之學病間井子弟不知  
所教建龍洲義塾聘碩師陳其說以開來裔葺標慶庵  
捐田入之定爲祭規一十五則以示宗族家雖異爨久  
忽慨然曰兄弟手足爾其何分乎遂合食焉立義約若  
千條教子孫守之弗易其制行粹凝臨事剛毅有不讓  
古之賢者嗚呼何章氏之多賢子孫哉濂竊觀之世家  
巨室能使遺裔蟬聯而弗之絕者皆其先德之所敷遺  
譬如良疇之種至秋而必穫嘉木之植逢春而必榮其

理實可徵不誣也昔者王翁孺爲繡衣御史能活萬人  
論者識其後昆之當興鄧仲華自謂將百萬之衆未嘗  
妄殺一人君子知其來葉之必大況乎練氏能全一城  
之命較茲二者實過之矣宜乎子孫代有名人其出而  
列仕則秉鈞軸位法從綰郡縣之章項背相望功惠既  
已有加於民其處而沉晦則被服仁義篤志書詩雅雅  
彬彬譽望隆蔚又能不殞厥世矧今迓續芳猷踵承遺  
烈者吾未見其止也君子之澤古之所謂汪洋而衍裕

者寧有既耶濂久與濫交而其子存厚又從濂學治經  
於是知其系緒爲詳序而勒之石以爲世之勸讀茲文  
者尚當有所興起也哉系之以詩曰

天道維仁法之者昌陰施陽報厥理用章理將孰樞命  
之攸定有如灰籥氣至而應卓哉章氏曰太傅公建節  
駐兵以靖鄉邦其配練氏生而肉髮沉幾先知物不踰  
越二校失期在法當刑練氏止哉聽其間行校仕南唐  
帥師攻城陷將屠銜德罔變十萬之氓已登鬼庭片

言之加易死爲生子孫繩繩多躋膺仕水湧山出未見  
其止或膺郡寄或坐廟朝照耀後先聯組疊貂沉潛自  
晦亦振厥德俎豆詩書是攻是食遺澤迄今世象其賢  
有光熒然如虹貫天龍泉之宗光康且懿益行以承允  
亢其世人亦有言養自藥牙蔚如車輪大揭其華彼不  
暢者非沮而遏荒如蕨如其本斯撥豈無簪纓或淪卑  
臺視彼德門其高崔嵬天亦何爲盛衰頓異居高聽卑  
心焉是視稽諸古訓善積慶餘何以引之勿忘其初太

史造文勒於貞石尚告嗣人服膺無斁

上虞縣重修柯韓二牐碑

上虞有湖名夏葢延袤一百餘里縣東北衆水經上妃  
白馬二陂匯於湖醜爲三十六渠支分絡聯以達於田  
凡溉一十三萬畝有畸渠之下流建二石牐視時溢乾  
而畜洩之歲恒無凶者近代農官失政畚土成塍取給  
一朝不旋踵而圯傍縣亡賴男子當旱暵時又夜半決  
防以去然湖並於海鹵水或乘湖入善禍稼舊嘗造隄

捍其衝潮汐齧蝕至是亦暴潰民憧憧告病矣乃洪武  
四年冬臨淮唐侯鐸自殿中侍御史出守會稽上虞會  
稽屬縣人士羣走白侯侯愀然弗寧行海上視決堤與  
民共約度田以會粟因口以賦傭鑿石爲隄自蓮花池  
至纂風合萬有三千尺始與故石隄屬侯斬牲饗海神  
已登民謂曰隄幸成二腴無難者會侯召入爲卿奉常  
遂命僚屬集事其柯家腴廣二十有四尺深如廣之數  
而羸其一先築土樹檠櫛比星攢度久且不壞方敷以

石兩翼四隅咸斂斲如法中峙石楹左右皆有副楔坎  
陷版以爲縱閉復隨土形崇卑䟽級爲五以瀉水上架  
石梁以便行者槩以章計者九百八十有五灰以斛量  
者三百六十又四石以丈數者七百三十有八匠以日  
考者一千三百其韓家牐廣減前牐之半深比廣倍之  
石楹唯二級道則減其一仍冠以石梁餘皆同其工物  
視前匠損四百石損五百灰損六十八槩損二百八十  
一始事洪武甲寅秋七月訖工於冬十有二月此其大

凡也有道浮屠雷峰淨昱乃具事狀介太史氏朱君右  
徵濂文記其成予聞成周之時稻人掌稼平地以潴畜  
水以防止水以溝蕩水以遂均水以列舍水以澮瀉水  
其爲法甚脩其爲利至久也然而溝澮之屬所可考者  
其深廣自四尺至八尺或至於尋仞各二先王豈不知  
害地而廢稼以爲不若是則水性失其常溢則有溺患  
乾則禾將菑矣古制不可復見有能設潴防以惠民者  
得不謂之賢哉昔者曾文定公之爲齊州州城西北有



湖疏爲水門遇流潦暴集則取荆葦爲蔽納土於門以防外水之入公爲易之以石其深八十尺廣三十尺視水高下而閉縱之而禁障宣通皆得其節人無後虞今唐侯之爲牖也其事與之頗相類世言古今人不能相及果足信之歟是可書已相其成者通判府事吳敬知縣張翼營度督視不憚勞勩者主簿史文郁也司其出內則邑大姓徐某余某法宜牽聯得書海堤別自有記茲可略云系之以詩曰

維夏蓋湖百川所潴在彼海邦其一醴爲通渠行水委蛇

溉稻與秔

其二

制水有脾因時闢闔其法孔臧其三農政斯

缺惡壤爲竭水失厥防

四

侃侃唐侯爰諮爰諏中心盡

傷

五

曰是弗修民焉有秋敢視爲常

六

乃登乃屬乃謀

乃告乃輯其長

七

晦會其粟工來以族筮日奏功

八

石於山樹檠於灣以捷以梁

九

決塞有關既堅且完若

首有航

十

昔何怒突今乃順則弗隳我疆

十一

行彼赤

日清流滴滴黃茂芄芃

十二

食爲民天非稼無年民用

卒矣

其十三

伊誰吾憐五馬翩翩朱衣忽珩

其十四

成周之

制有溝有遂經畫維良

其十五

古法浸廢河渠興利其效

則章

其十六

漢吏曰循惠享蒸民唯此之費

其十七

矧乎鉅

津北枕海濱澤被五鄉

其十八

侯治之棘行龐心惻不翅

父兄

其十九

越石可泐越川可竭侯功勿忘

其二十

### 義烏重濬繡川湖碑

義烏有繡川湖在縣西一百五十步廣袤九里三十步

舊設東西中三管稽其戶田之數以均水利其所溉凡

八百九十五畝後加疏濬之功其利愈溥以晦計者至  
於一千五百而贏東南各有斗門醴以二渠東渠循堤  
折行會於南又折而東疏爲三以達於田然而衆流行  
潢洿間挾之入湖其勢易致填闕在宋紹興甲子知縣  
董燿請湖爲放生池嘗一濬之淳熙戊戌縣丞吳沃以  
春夏暴漲而淫管不能宣洩始更爲牐視羸縮而司啟  
閉仍架石橋其上人因以吳公名之開禧丙寅縣丞胡  
行景定甲子知縣林桂發復皆重濬之自後無繼之者

一遇亢陽爲沴水輒涸田遂不稔曲阜孔侯來爲縣之  
三年政通人和百廢俱興乃躬履湖濱愀然而嘆曰無  
湖是無田也茲非縣令之責乎歸與僚佐謀集八鄉二  
十八里之民量地定繇分鄉授事各植小幟以別其界  
域使之不相淆亂嚴示期約責其成功於是畚鍤齊舉  
有不戒而趨之意侯恐其過於勞也趣承水利之家具  
酒漿菹醢以食之勸相既頻功緒日就湖之北故爲官  
道水齧蝕且盡因築而廣之湖南沿隄亦有曲徑以通

人行居民侵塞且及湖百尺皆斥而復之雜藝花柳映帶左右復聚土爲山於花島之後經始於今洪武戊午正月十五日至三月十八日湖之濬已及三之二以東作方興遂輟其功其深約五尺有奇役工三萬二千有奇自興是役晝恒晴夜或雨雪迨夫遂事淫霖久不止君子謂侯愛民之所感是歲婺七縣大旱並湖之田獨獲有秋縣人士懷侯不能忘援昔人名橋故事既名土山爲孔公墩以識侯功復來謁予文爲記欲示後之爲

令者俾嗣濬之余觀載籍之中有民社者能修陂渠之  
政則屢書之而不厭其詳此無他以民食之所繫故特  
用是以爲勸也昔者史起之爲鄴令大興水利以利民  
至有鴻鹵生稻梁之謠逮今五尺之童亦有能知其賢  
者世之爲令者苟能如起之愛民其修名有不垂於無  
窮者乎繡川湖縣之巨浸一方之所倚賴自景定甲子  
以迄於茲已閱一百十五春秋佩銅章墨綬者不知其  
幾人皆漠然不以爲意而孔侯獨能行之可謂無愧昔

賢者矣因脩書之勒於金石非惟永侯之文抑亦勸來者使亦效之也侯名克源字敷夫孔子五十五代孫系之以詩曰

華川之墟衆水所趨其勢回旋匯而爲湖黃流奔衝歲受洿濁不有濬之化爲平陸孰爲其先澤我甫田孰爲其後維今之賢其賢爲誰裔自曲阜我照我育不翅召父百齡絕饗曰吾繼之民食攸繫何敢弗思乃程土功乃集徒旅畚鍤齊興其來如雨森之綢綢斥之絺絺翕



之鳩鳩離之休休窳者既深壅者斯戢建牖築防節其  
出入潦水時行納之若虛猶如東瀛注於尾閭亢陽爲  
沴靡神不格徒爾號呼土毛盡赤我行我野黍苗芄芃  
亦有流泉其聲淅淅人力勝天道古之義胡不是修索  
諸茫昧彼歲邁凶我年獨豐拊已而思曰誰之功效在  
不刊非文莫紀采而書之敢告惇史

趙氏族葬兆域碑銘

金華趙君古愚篤學而好修以其先世造家孔艱歿者

多塗殯於郊乃與二弟古怡古忱謀黜衣殺裳歷十年之久始克族葬於縣之慶雲鄉青岡山之原鄉先達衢州教授胡公翰既爲撰文表諸阡古怡復以爲昭示後嗣辭不厭其繁力請濂申言之濂以古怡存心愿慤行義如古人不欲重違其意頗諾之自時厥後竊祿於朝徒以未成之學操觚染翰無以應求文者之紛紜由是不及爲者蓋八年於茲矣古怡又介宗叔嗣泰請之愈堅遂案其圖狀而序之趙氏於宋有屬籍廣陵康簡王

德雍實魏悼王之第四子五傳至太中大夫堅之始自  
汴徙於衢古愚七世祖也特遷之於中穴餘則分左右  
而序列焉右則高大父遂昌令盱夫大父永濟倉副使  
若磬伯父嗣淇嗣鴻叔父嗣淵也左則曾大父時堯叔  
祖父若隆父某州路學錄嗣滋及弟某縣某處巡檢古  
恒也太中公碩人田氏高祖母曾祖母二徐氏祖母陳  
何李三氏叔祖母童氏母葉氏叔母張氏嫂張氏皆祔  
從夫穴而太中公之子常熟丞公傳常熟之子長溪丞

彥鉞皆不遷以長溪君寔蘭溪常熟君葬衢者久也今  
所葬者始自太中公即繼以遂昌君者遂昌長溪之子  
也八世之中凡二十喪昭穆惟叙尊卑不亂厲限有截  
羨道中度神靈載寧人道勗順鄉之大夫士過之者咸  
相與慕咏而去蓋大江以南拘泥於堪輿家謂其水土  
淺薄無有族葬之者他未遑深論雖以父子至親其兆  
或相去近或十里所遠乃至於踰百夫以一氣所生喘  
息之相通魂神之相依乃使之曠絕疏遠如此豈人心

天理之所安哉周官有墓大夫掌凡邦墓之地域爲之  
圖令國民族葬而掌其政令正其位掌其度數使皆有  
私地域釋者曰位謂昭穆也度數謂爵等之大小也古  
者萬民墓地同處分其地使各有區域得以族葬嗚呼  
它姓尚爾況同族同氣者乎何爲離而異之何爲離而  
異之古愚兄弟一即乎義理之正而弗蹈夫流俗之失  
不亦行古之道哉行古之道可謂君子者矣抑聞之趙  
氏既家衢常熟君又遷蘭溪副使君又遷婺城人遂爲

金華府人其世德宗系各見公所述墓銘其族葬之時則洪武戊申歲冬十月壬午日也銘曰

人之生也聚族而居朝焉暮焉胥會於堂序之上冠衣濟濟而笑語嘻嘻奈何其歿也則異而藏之設其有知也未必能瞑目於泉下若其無知也揆諸人情而胡乃忍爲自堪輿家倡爲禍福之論舉世紛紛遂瀾倒而波隨縱曰其理之所必有徇利而忘孝亦昔賢之所嗤況涉於茫昧恍惚弗能使智者之無疑不有君子孰覺其

非今昭穆有序塋域具宜其安死者如生又惡知不順  
夫秉彝予所以取之而樂道之者亦中心深有感慨乎  
而噫

麗水陳孝女傳碑

陳孝女妙珍處之麗水人父南溪爲神祠祝史蚤夭母  
某氏更適他族妙珍依大母林氏以生林嬰末疾妙珍  
刲股雜淖糜以進疾遂瘳或告之曰此若女孫股肉之  
功也林悲泣曰吾耄矣死固當然何用苦若耶疾復如

初妙珍偃偃如有失賣衣走浮屠氏作諸禳禱事皆不應林忽昏眩妙珍解髮相糾纏哀號良久乃甦自是氣益弱僅有一絲相屬妙珍計無所出燃香右臂上稽顙籲天乞以身代復不應至正四年四月壬申夜夢一丈夫冠烏紗巾服青布袍來告妙珍曰爾勿憂能剔肝食之則愈矣妙珍問曰欲剔將焉從丈夫指右脇示之且俾吞紅藥半丸吞已遂覺甲戌妙珍乃具湯沐浴露禱上下神祇時空中雨墜妙珍之身獨不霑濕若有張蓋



覆之者妙珍益喜持刀視脇下見紅痕如縷長可三寸  
許就痕上割之血滂然流再割之了無所見妙珍懼乃  
擲杯珓卜於神速俯身拾之而肝忽出懸亟反之寘几  
上爇香自誓云大母倘得生終身持菩薩戒不復適人  
矣尋取肝聶而切之雜竹萌烹之大母食纔下咽其疾  
頓愈妙珍懲前事戒左右勿漏言然創鉅甚幾至危殆  
復夢神人語之曰無傷也宜鍊紙作灰傳之妙珍從其  
言果愈時年十四耳後三年林以壽終妙珍造塔瘞之

復然頂申前警棄家爲優婆夷前進士永嘉高明來官  
郡錄事爲上其事部使者大名高履覆按得實以聞次  
於朝詔有司具烏頭雙表之制旌表其門仍月給粟一  
斛養其終身時八年春二月也郡守固始黃某以其事  
有涉名教也命儒學教授鄭汝原爲記其事於石云  
史官曰人子之於親本宗一氣苟可以死生者勢當共  
之肯以形體既分而視之有異耶當親有疾時呼號天  
地鬼神遑遑求索茫昧中力有可致雖萬死弗之顧又

奚暇毀傷絕滅之計耶或者作鄆人對痛斥之余不知其何所見耶夫忠孝無二道忠臣肝腦塗地世未嘗指以爲非顧獨於孝子而疑之耶此決非韓子之文其依倣而托之者耶余聞之慈溪黃東發之言如此因造陳孝女傳故備論之

重建龍德大雄殿碑

佛法之入中夏始於漢明帝永平八年此說殆非也中夏知有佛蓋已久矣周穆王時西域有化人來能出入

水火王爲築中天之臺列禦寇之書所載西方有大聖人不治而不亂不言而自信不化而自行雖不明言其爲佛其事固皆佛也況乎天竺室利房等持經來秦而始皇謝去之漢武帝詔霍去病討匈奴獲休屠王祭天金人祠之甘泉成帝命劉向校書天祿閣往往多見佛書哀帝遣景憲使大月氏得其王口授浮屠經而還是則明帝以前經之與像中夏皆有焉至於永平以後而其教法始恢弘耳然而中州之人奉佛者雖多江南塔

廟則自吳大帝赤烏四年康僧會所造建初寺始發之  
浦江從仙華山降勢而下其東支蜿蜒而來曰龍峰峰  
之麓龍德寺在焉乃法瓌禪師道場初名乾元宋大中  
祥符元年更今名嘉定中寧宗親書寺額以賜之寺無  
碑碣可徵不知何時建立相傳爲赤烏中予竊惑之僧  
會之化方行建業而浦江在千餘里外何緣遽有興蘭  
若事乎乾元乃唐肅宗紀年以年名寺其殆或肇於唐  
歟寺廢將圯元大德九年住持僧善興及其徒永鎮悉

撤其舊而新之先是龍峰之上有塔七成宋天聖三年僧咸若募兵部侍郎胡公則捐錢五十萬所建至是亦一新之且造塔院一區湧殿飛樓雄麗華煥爲一郡佛宮之冠歲時祝釐縣之諸浮屠悉萃焉元末兵亂一夕皆爲煨燼寺之二比丘至德守約盡然傷心乃合謀曰前人之功吾儕不可不繼也而力未能徧及宜先其大者以爲衆倡樂善之士豈無從而和之者乎於是黥衣縮食重剏大雄殿五楹間其廣一百一十尺深比廣稍

二十尺崇比深復綢其四十尺經始於洪武九年之十月落成於十三年之三月匠以日計者八千米以石計者一千錢以貫計者五千而所就之夫弗與焉二比丘以成功之孔艱也欲使嗣人知所保護介予學子吳誠來請記嗚呼久遠劫來諸佛出世其化度前後固不可以詳知而先儒則謂穆王之世中夏已昉見之越一千六十餘年至明帝法始盛行又越一百七十餘年至吳大帝江南方知有佛秘藏之莫顯至道之難聞亦已甚

矣今也祇園梵林交接乎東西琅函玉笈充牣於左右  
則其證修宜若易易然者而闡提之人猶日衆多自非  
僧崇其像變宏侈其實坊何以新其瞻視而祛其疑妄  
者哉此二比丘所以協力起廢而不敢緩也真如妙智  
含生本具當有繼軌轍而興事功者不數年間一復大  
德舊觀予安敢謂無其人哉故因作記特稽佛法緣起  
而嘆其不易遭逢意將起人之敬信苟謂泛引而續言  
之非知予者也系之以詩曰



西方大聖天人師降本垂迹攝羣機五色神光貫太微  
九龍行水香襲衣六齡寂默和天倪明星一出絕去來  
大音演法寶華垂像教東漸自蒼姬秘藏弗顯昧若黔  
後千餘歲寢光輝白馬馱經息鴻盧從此祠廟覃夏夷  
仙華名山如曳旂青龍東逝勢欲飛穹塔爲角弁木髻  
掩映樓觀聳巍巍髣髴率中天移劫火洞熾風鼓威  
盡化丹雘爲荒榴二士見之心酸嘶欲符西土化人爲  
彈指勿使鬼神窺四阿凌虛截絳霓一倡當知百和隨

千楹萬礎列參差行者規制踰昔時調御丈夫示弘慈  
植埴索塗哀世迷手擎日月耀九旭疾步長趨絕險巖  
歷劫難值心勿疑浦陽長江流渺瀰江水可竭道無虧  
起壞屬之誰尚告繼者徵斯碑洪武十三年夏四  
日前翰林學士承旨嘉議大夫知制誥兼脩國史  
兼太子贊善大夫縣人宋濂撰

文憲集卷十六



總校官庶吉士臣侍朝

校對官助教臣金學詩

膳錄監生臣俞鳳